

儀
顧
堂
題
跋

儀顧堂題跋卷六

歸安陸心源剛甫撰

宋本孔子家語跋

孔子家語十卷宋刊大字本每頁十八行行十七字小字廿四五不等有東坡居士兩方印卽汲古閣秘本書目所稱北宋蜀大字本爲東坡所藏有東坡折角玉叩者也後有毛子晉斧季兩跋中間稍有缺頁子晉據他本抄補愚案瑗字爲孝宗爲皇子時原名書中瑗字缺避則非北宋刊可知字亦圓潤非顏歐體鄙意疑爲紹興監本東坡印亦甚劣其爲後人僞

造無疑子晉殆爲所愚耳家語雖王肅僞造而所據
多先秦古書天祿琳琅書目祇有影宋抄此外藏書
家更無以宋刊箸錄者則此本卽非北宋恐世無第
二本矣汲古秘本散後不知何時流入皖中今爲蕭
敬孚明經所藏余游申浦明經出以相示因跋其後
而歸之

宋本賈誼新書跋

新雕賈誼新書十卷題曰梁大傳賈誼撰宋刊本日
後有建甯府陳八郎書鋪印一行蓋南宋麻沙本也
校以正德九年陸相本何元朗本何鏜漢魏叢書本
卷七諭誠篇是以國士畜我我故國士爲之報何鏜
本作是以國士遇我我故國士報之下奪故曰士爲
知己死女爲悅己容非冗言也在主而已二十四字
何元朗本舉被而爲禮下惟存墨釘退讓篇梁大夫
有宋就者爲邊縣令云云至楚王媿凡三百九十二
言何鏜本刪削改易祇存二百六十四言何元朗本

則全缺正德陸相本國士報之下缺二十餘字誤接
退讓篇使者曰否云云而缺其篇首三百餘字使字
上又衍大字想所據宋本有缺頁遂連爲一耳後來
諸本多從陸相本出故缺文亦相類也

宋刊明補本賈子新書跋

賈子新書十卷明正德九年長沙守陸宗相補刊本
每頁十六行行十一字自序至跋凡二百七頁前有
黃寶序後有洎熙辛丑胡价跋案是書北宋刊本無
聞洎熙辛丑程給事爲湖南漕使刊置潭州州學據
胡价跋字句譌舛以無他本可校未能是正正德中
陸宗相守長沙得殘版數十片因補刊成之見黃寶
序是其中尚有宋洎熙殘版特不多耳正德十年吉
藩又據陸本重刊于江西余官閩時从楊雪滄中翰
借校與此本行款悉同其後何元朗程榮何鏜諸本

皆从此出惟所據之本摹印有先後全缺有不同耳
宋本不可見得此亦不失爲買王得羊矣此本勝于
吉藩本吉藩本勝于程榮本程榮本勝于何鏗本明
刻諸本以何元明爲最劣耳

宋本新序跋

新序十卷每卷題曰陽朔元年二月癸卯護左都水使者光祿大夫臣劉向上每頁二十二行每行二十字前有曾鞏序連接目錄曾序末有亦足以知臣之志者鞏集作亦足以知臣之攷其失者豈好辨哉小注二十五字卷三樂毅條順庶孽下有史作餘教未衰執政任事之臣修法令慎庶孽小注十九字卷十沛公條保宛城下有史作與南陽守戰讎東破之南陽守齧走保城守宛小注二十一字張子房之謀也下有楚雖無疆漢史作楚唯無疆小注十一字漢五

年條功下子房上無張字有一作張子房之謀也小
注八字漢六年條雍齒與我有故下有漢書音義曰
未起時有故怨小注十一字高皇帝五年条卒爲建
信侯下有封之二千戶正文五字孝武皇帝時大行
王恢條代國墮城下有漢史作以飽待飢正治以待
其亂定舍以待其勞故按兵覆衆代國墮城小注二
十八字正遺人獲也下有漢史作不至千里馬乏食
兵法曰遺人獲也十八字

新序跋

新序十卷明何允中刊本每半頁十行行二十字前有曾鞏序案隋書經籍志新序三十卷錄一卷曾鞏序則云今可見者十篇是新序原本三十卷至宋仁宗時祇存十篇藝文類聚太平御覽所引多有出于今本之外者皆三十篇中逸文盧抱經羣書拾補已搜輯無遺羣書治要比今本多四條一爲孟子見齊宣王于雪宮至未之有也凡九十五字一爲齊有田巴先生者至斯齊國治矣一百七十八字一爲臧孫行猛政至退而避位凡五百八十九字一爲子路治

補至其民不擾也一百四十一字與類聚御覽所引
大同小異亦皆三十篇中逸文也

說苑跋

劉向說苑二十卷明楚府刊大字本半頁十行行十九字是書有宋咸清本盧抱經以程榮本互校復恩篇多遺伯玉得罪于衛君晉大夫有木門子高一條尾生殺身以成其信一句見羣書拾補此本比程榮本復恩篇晉趙盾舉韓厥條欲誅趙氏下多初趙盾在時五字與宋本同而少楚莊王賜羣臣酒一條陽虎得罪北見簡子一條是書明凡五刻有四川蜀府本嘉靖何良俊本程榮漢魏叢書本何鏜漢魏叢書本及此而五何鏜本出于程榮程榮本出于何良俊

此本字大悅目與何良俊本互有得失

申鑒跋

申鑒五卷漢潁川荀悅箸黃省曾註本以羣書治要
所引校勘一過知今本奪落甚多政體篇民作基下
奪制度以綱之事業以紀之兩句無或詐僞下脫盜
巧二字外無異望慮其下脫有罪惡者無五字則賢
臣不用下脫賢臣不用四字上不訪下脫下字不諫
下脫上字雜言上君子三鑒下脫鑒乎前鑒乎人鑒
乎鏡三句雜言下或曰進諫條後脫或問天子守在
四夷有諸至一言之冠襲于膝下患之甚矣凡一百
七十五字此外如傅子帝範注困學紀聞所引亦尙

有可補此本之缺者是書刊于正德中當時宋本必
多省曾意在作注以抒寄託不暇訪求善本故譌奪
如此耳

中論跋

中論二卷漢北海徐幹撰明弘治黃華卿刊本前有無名氏序曾鞏序後有石邦哲陸友仁題記都穆跋校以羣書治要法象篇行必有檢故下脫言必有防行必有檢入字修本篇不宿義下脫焉言而不行斯寢道矣行而不時斯宿義矣十七字賞罰篇脫天地之間含氣而生者至亦萬代不刊之道也云云凡四百三十餘字昔之聖王判爲禮法至不亦遠乎凡五百四十餘字案曾鞏序云始見館閣中論二十篇及觀貞觀政要太宗稱嘗見徐幹中論復三年喪篇今

書獨闕又考之魏志文帝稱幹箸中論二十餘篇乃知閣本非全書又晁公武讀書志云李獻民所見中論別本實有復三年喪制役二篇今觀天地之間云云一篇所言皆三年制服之事卽貞觀政要所稱復三年喪篇也昔之聖王云云一篇所言皆力役之事卽晁氏所謂制役篇也後有重刊是書者宜採治要補此二篇則中論爲完書矣

宋刊麗澤論說集錄跋

麗澤論說集錄十卷宋呂祖謙撰宋刊本每葉二十行行二十字版心有刊工姓名及字數間有無字數及刊工姓名者則元時修版也宋諱多缺避至愼字止蓋光宗時刊本日後有喬年記是書宋史藝文志儒家類箸于錄作麗華論說集當傳寫之訛卷中有譙國戴氏藏書記朱文長印經農二字白文方印其人俟攷行款與東萊文集同蓋同時所刊也

朱子讀書法跋

朱子讀書法四卷宋張洪齊原同編原本久佚乾隆中館臣从永樂大典輯出者宋史藝文志文獻通攷皆無其書明文淵閣書目始著于錄案洪饒州永豐人淳熙十三年解試見江西通志原序稱洪孝謹清修有志聖賢之學其居官必有可觀而四明志不爲立傳職官表亦無其名亦缺典也

宋槧政經跋

眞文忠公政經一卷宋眞德秀撰宋刊本每葉二十行每行十八字版心有刊工姓名前有淳祐二年王邁序宋史藝文志文獻通考書錄解題皆無其書明文淵閣書目始著于錄案是書爲西山守泉州日所箸門人趙時棣宗華爲大庾令梓于縣齋以

文淵閣傳抄本參校大畧多同惟缺王邁序耳卷首有臣馮翼白文方印孫氏鳳卿白文方印蓋明孫鳳卿舊藏也

宋槧心經跋

心經一卷宋眞德秀撰宋槧本每葉二十行行十八字版心有刊工姓名後有顏若愚跋宋史藝文志無其書書錄解題文獻通考皆作心經法語明文淵閣書目題名與今本同

四庫全書儒家類箸于錄王臞軒政經序云端平初理宗嘗命洪舜俞作序今平齋集無此文則洪雖受命而未作校以

文瀾閣傳抄本大畧多同惟缺顏若愚跋案若愚晉江人嘉定十三年進士興化教授見 關通志

宋槧大學衍義跋

眞西山讀書記乙集上大學衍義四十三卷前有德秀自序進書表尙書省劄子中書門下省時政記房申狀宋槧本每頁十八行行十七字宋諱皆缺避語涉宋帝皆提行目錄子目雙行案讀書記乙集下湯漢序云讀書記惟甲乙丁爲成書甲丁二記先刊行乙記上卽大學衍義久進于朝與此本合是大學衍義實讀書記中之一集明弘治刊本削去讀書記乙集上六字萬厯刊本仍之若非此本僅存後之人不知乙集上爲何書矣弘治本半頁十一行行二十一

字凡提行欵式一仍宋本之舊惟西山自序加以註
釋殊無謂也

宋本眞西山讀書記跋

西山眞文忠公讀書記甲集三十六卷乙集下二十卷丁集八卷宋福州學刊本半頁九行行十六字小字雙行行二十四字前有開慶元年湯漢序丁集末有監雕福清縣學主張奎通判福州黃巖孫福建安撫使參議官涂等銜名元修之頁版心有延祐五年補刊六字及刊工名是書近有閩中祠堂刊本脫落譌謬幾不可讀此乃南宋初刊祖本字畫清朗體兼顏歐尙存北宋官刊典型非麻沙坊本所能及也丙集未見傳本愚觀心經政經雜采前人之說體例與

有屬望是足卷之二
衍義讀書記相近意者其卽丙集乎

性理羣書句解跋

性理羣書句解二十三卷宋熊節撰熊剛大註文淵傳抄本案節字端操福建建陽人十歲讀易卽知問難至通曉而後止慶元乙未廷對值僞學之禁以納諫行正求賢對知舉黃由以其不迎合時好特置前列且爲奏御累官通直郎知閩清縣著有中庸解三卷智仁堂藁及此書剛大少穎敏從蔡節齋黃勉齋游問學精專操行篤至嘉定七年進士官建安府學教授學者稱古溪先生著有詩經註解小學集註見性理大全及李清馥閩中理學淵源考乃福建通志

不爲立傳宋元學案亦無其名皆缺典也

宋刊性理羣書句解後集跋

新刊音點性理羣書句解後集二十三卷宋麻沙刊本每半頁十三行每行大字二十四小字二十五六不等不箸撰人名氏惟卷十四有建安後學熊剛大集解九字當亦熊節所編也各家書目及福建通志皆未著錄卷一至卷十二近思錄卷十四至卷二十近思續錄卷廿二廿三近思別錄續錄爲節齋蔡模所編取朱文公之格言依近思錄門類編錄故曰續錄別錄亦節齋所編所取皆南軒東萊之格言故曰別錄卷首有武原鄭氏朱文方印蓋明鄭端簡公舊

藏後歸海甯吳兎牀拜經樓有臨安志百卷人家白
文長印拜經樓題跋記箸于錄題爲宋刊近思正續
錄而不箸性理羣書句解之名不知爲熊節所編熊
剛大所註則吳壽暘之陋也

齊民要術跋

齊民要術七卷影寫宋刊本每葉二十行行十七字以祕冊彙函刻本校之刻本譌奪甚多思齋白序題名下刻本脫雙行注二十八字序家有丁車大牛脫有字歲時農收後脫農收二字因地之利下脫謹身節用以養父母八字生習使之然也脫使之二字夫孰自知非者也脫夫非者三字雜說秋收治田後譌秋收後治糧卷一耕田篇周書曰至百果藏實小注譌作正文耨不如鍤鍤譌刻休息之下黨正屬民飲酒正齒位是也小注譌作正文收種篇無好厭好厭

譌籌脫下𧈧字種穀篇及附字下脫令稼不蝗蟲骨
汁及繰蛹汁皆肥使十三字卷二黍稷篇注黍米不
成下脫八字皆卽濕踐下脫注十一字又難舂米碎
下脫四字疆土可種黍下脫注二十九字水稻篇注
田之畦埒也下脫六字禮月令條注此謂學稼下脫
十二字胡麻篇首小注巨勝下脫五字白者油多下
脫十一字卷三種葵篇美于秋菜下脫注八字蔓菁
篇注非蕪菁也下脫二十一字種蒜篇首小注蒜葷
菜也下脫三十五字大宛之蒜下衍五字脫三十一
字種葱篇首小注廣志曰上脫二十八字荏蓼篇首

小注植荏也下脫四十字種薑篇首小注苳音下脫
十一字置屋中下脫注十三字藁荷芹蘼篇首芹楚
葵也下脫十三字種苜蓿篇首採苜蓿種歸下脫八
字一如葦法下脫注十六字雜說篇入太學入小學
下皆脫學字注以和豆黏下脫九字非我也兵也下
脫注三十五字豐年尤宜多糴年譌者米石至下脫
數字月影長二尺下脫赤者二字卷四園籬篇間刪
去惡者刪譌斷剝去橫枝剝必留距剝皆譌剝剝去
木枝也明人不識剝字妄改爲剝鼠耳蚩翅翅譌翅
種棗篇首爾正曰至檢棗正文誤作小注三月熟下

脫十八字大白棗下脫四字三星棗下脫五字崎廉
棗下脫五字赤心棗下脫十五字從燕下脫三十八
字擇去胥爛者下脫注十一字種桃篇爾正曰至山
桃十字正文譌作小注桃酢法前脫正文又法二字
注二十四字櫻桃注凡三種下脫十二字一名午桃
上脫二十六字種梅杏篇首小字蓬萊杏下脫十四
字神仙傳條注董先生杏下脫一百一字種梨篇首
小字耐寒不枯下脫二十二字杜如臂條去地五六
寸下脫注五十三字陽中者下陰中枝則奚少小注
譌作大字以土培覆之下脫令梨枝僅得出頭以土

雍四畔當梨上沃水水盡以土覆二十二字種菜篇
卽于屋裏埋著溼土中脫屋裏二字奈林檎篇壓桑
法下脫小注十六字又法下脫小注二十三字種柿
篇如插梨法譌作插柿法下脫注十四字安石榴篇
一重土重譌寸以蒲蘘裏脫蒲字卷五種桑柘篇凡
耕桑田條後脫又法剝桑十二月爲上時正月次之
二月爲下大率桑多者宜苦斫桑少者宜省剝秋斫
欲苦而避日中冬春省剝竟日得作春採者必須長
梯高机數人一樹還條復枝務令淨盡要欲旦暮而
避熱時秋採欲省栽去防者榘熟時多收曝乾之凶

年粟少可以當食種柘法耕地令熟耬耩作壟柘子熟時多收以水淘汰令淨乾散訖勞之草生拔卻勿令荒沒三年間廩去堪爲渾心扶老十年中四破爲杖任爲馬鞭胡牀一百六十三字又脫小注二百二十餘字禮記月令條注養蠶之器下脫十字永嘉記條與重卯相齊重卯二字譌種龍魚河圖條比至再眠再譌在種榆白楊篇改雀損穀譌改摧損谷白楊條注木性多曲下衍四字脫廿七字種槐柳篇楊柳條少枝長疾下脫一赤已上者插箸壟中二赤一根數月卽生少枝長疾二十一字雜材及枕枕譌枕三

寸截之截譌絕種梓法條有草拔令去拔譌枝楸既
無子脫楸字既譌卽梧桐注今梧桐下脫二十一字
樹別下子一石脫樹字別譌剝青白二材材譌桐種
紅藍花篇作燕脂法著瓷碗中瓷譌甕合香澤法合
譌石好清酒好譌如蘭香上脫澤字猪脂一分脂譌
腹瀉下脫著瓶中三字合手藥法猪脰一具脰譌脰
作米粉法梁米第一梁譌染舒布于牀上舒譌書粉
英如梳脫梳字種藍法相去八寸下脫小注十二字
又脫正文白皆卽急鋤五字卷六養牛馬篇如穴中
看火脫火字尾本欲大欲高脫欲高二字尾下欲無

毛毛譌尾養豬篇豚一宿蒸之下脫不蒸則三字卷
七貨殖篇筋角丹砂奪丹字旃席千具席譌車曰中
擣令碎擣譌受直下饋饋譌讀實勝凡麴勝譌暘作
神麴方秋以九月九日脫九日二字然要須善候麴
勢善譌蓋但不及春秋耳及譌兵一切無忌忌譌己
擗黍令破令破譌今頗此外注文譌奪尙難枚舉唐
以前難讀之書要術居其一得此抄本校訂稍覺文
從字順惜祇六卷有半後數卷無可訂耳

原本王楨農書跋

農桑通訣集六穀譜集十農器圖譜集二十題曰東
魯王楨撰其書改卷爲集可稱創格嘉靖中山東巡
撫邵錫得此本命布政使顧應祥刊行之前有嘉靖
庚寅臨清閭閻序雖與聚珍本分卷有異而大旨多
同農桑通訣首農事起本牛耕起本蠶事起本三條
列于集一之前上圖下說穀譜集一之前有神農嘗
穀圖黃帝火食圖每集之前各有總目農桑通訣目
首有雙行注五十餘字言所以名集不名卷之由皆
聚珍本所無楨自序云爲集三十有六日二百有七

十則集之名爲楨原本所有非明人妄加也凡遇國家等字皆頂格當從元刊翻雕者提要云今外間所有王楨農務集卽從是集摘抄又云永樂大典所載併爲八卷割裂綴合已非其舊則原本之罕見可知矣徵引古書多本齊民要術而不著所出已開明人剽竊之習惟要術久無善本脫譌幾不可讀當藉此書校正之

宋刊武經七書跋

孫子三卷吳子二卷司馬法三卷六韜六卷尉繚子
三卷三畧三卷李衛公問對三卷宋槧本每頁二十
行每行十九字版心有字數及刊工姓名殷徵貞恒
警敬完構讓慎皆缺避當爲宋孝宗時刊本七書彙
刊始于宋元豐二年事見李燾續通鑑長編元豐六
年國子司業朱叟言承詔校定孫子吳子司馬法衛
公問對三畧六韜諸子所註孫子互有得失未能去
取它書雖有註解淺陋無足采者臣謂宜去注行本
書以待學者之自得詔孫子止用魏武帝注餘不用

注亦見長編此本孫子亦無魏武注殆因朱說而削之歟

疑獄集跋

疑獄集三卷上中兩卷題曰贈中書令右僕射平章事魯國公和凝集下卷題曰將仕郎太子中允男和嶠迷影寫元刊本前有利嶠序至元十六年杜震序嶠先官知縣後官刑曹序所稱三任親民于劇邑二年作吏于秋曹是也是書原本百條勒成四幅前二卷爲凝所集後二卷爲嶠所續南宋時已佚一卷故晁公武郡齋讀書志亦以三卷本箸于錄與此本合今四庫箸錄四卷本乃後人分第三卷爲兩卷以足四卷之數亦非原書也此本二卷凡六十六條爲朱

竹垞抄以奉王漁洋者後有跋云元跋雖非完本猶存宋本舊式而未割裂者昭德所箸錄當卽此本所从出讀書志謂上卷爲疑書中下爲蒙續者誤也

影宋本宋提刑洗冤錄跋

宋提刑洗冤錄五卷影宋抄本題曰朝散大夫新除直祕閣湖南提刑充大使行府參議官宋慈惠父編文淵閣書目箸於錄不箸撰人名氏

四庫全書存目法家類提要云始末未詳錢竹汀養新錄亦云不知何許人愚案宋慈福建建陽人嘉定十年進士少受業於同邑吳雉雉爲朱子弟子

因得與楊方黃幹李方子論質學益進補贛州信豐主簿遷知長汀縣擢知常州歷廣東江西湖南提點刑獄終于直煥章閣知廣州廣東安撫大使淳祐六

年卒年六十四見劉後村大全集慈博記覽善辭令
丰裁峻厲望之可畏官主簿時屢平贛州劇賊及知
常州歲饑濟糶民無餓者提刑江西鱗次保伍姦無
所容台諫奏取其所行下浙右諸路以爲法序稱四
叨臬事者由江東而廣東由廣東而江西由江西而
湖南也新除直祕閣者由知贛州除直祕閣提點湖
南刑獄也充大使行府參議官者陳韓爲湖南安撫
大使兼節制廣西辟慈爲參謀也此書爲淳祐丁未
官湖南提刑時所編采內恕錄以下數家參以已見
會萃而成後世官司奉爲金科玉律觀其序後識云

賢士大夫如有得於見聞及親所歷涉出於此集之外者切望片紙錄賜以廣未備可見其求治之殷矣非賢者而能如是乎宋史循吏不爲立傳亦缺典也

儀順堂題跋卷六

三

儀顓堂題跋卷七

歸安陸心源剛甫撰

巢氏諸病源候論跋

重刊巢氏諸病源候總論五十卷目錄一卷題曰隋大業六年太醫博士臣巢元方奉勅撰元刊本前有翰林學士知制誥宋綬序每半頁十三行每行二十三字以明刊本校之卷十瘴氣候條四百七十一字明刊祇存五十四字青草瘴以下奪四百十七字此外字句之譌奪亦復不少証以外臺祕要所採諸論與此刊亦有異同聞東洋藏書家尙有南宋刊本惜

不得借校一過耳

靈樞經跋

靈樞經十二卷明成化熊宗立刊本愚案靈樞卽鍼經見于漢藝文志皇甫謐甲乙經序並非後出靈寶注以鍼有九名改爲九靈又以十二經絡分爲十二卷王砮又因九靈之名而改爲靈樞其名益雅其去古益遠實一書也請列五証以明之皇甫謐甲乙經序曰七略藝文志黃帝內經十八篇今有鍼經九卷素問九卷二九十八卷卽內經也又有明堂孔穴鍼灸治要皆黃帝岐伯選事也三部同歸文多重複乃撰集三部使事類相從爲十二卷今檢甲乙經稱素

問者卽今之素問稱黃帝者驗其文卽今靈樞別無所謂鍼經者則鍼經卽靈樞可知其証一也靈樞卷一九鍼十二原篇已云先立鍼經是鍼經之名見于本書其証二也王冰云靈樞卽黃帝內經十八卷之九與皇甫謐同當是漢以來相傳之舊說其証三也楊尙善隋初人也所著黃帝內經太素黃帝內經明堂類成中土久佚今由日本傳來其書採錄靈樞經文與素問不分軒輊與甲乙經同是漢唐人所稱內經合素問鍼經而言非專指素問明矣其証四也靈樞義精詞奧經筋等篇非聖人不能作與冰素問注

相較精粗深淺相去懸殊斷非硃所能僞託其証五也甲乙經林億等序曰國家詔儒臣校正醫書令取素問九虛靈樞太素經千金方及翼外台祕要諸家善書校對玉成將備親覽蘇魏公集本草後序曰嘉祐三年差掌禹錫林億張洞蘇頌同其校正神農本草靈樞太素甲乙經素問及廣濟千金外臺等方是靈樞爲宋仁宗時奉詔校正醫書八種之一非林億所未校特未通行耳唐自中葉以後醫學漸不如古鍼灸孔穴之法或幾乎息粗工藉術餬口旣不知鍼何論腧穴鍼經遂在若存若亡之間狹獮者改易其

名詫爲祕笈不學者逞其臆說誣爲僞書幾使秦漢
以來相傳之古籍與華陀中藏叔和脈訣等量齊觀
亦秦火以後之厄運哉是書宋以前本無異論至元
呂復始謂九靈鍼經苟一經二名唐志不應九靈之
外別出鍼經愚謂隋唐志中一書而數見者甚夥不
但九靈鍼經而已呂復淺人原無足責堇圃杭氏在
近時號稱淹博亦襲復之謬說詆爲淺短誣爲僞託
指爲林億高保衡所未校豈目未覩甲乙經序及蘇
魏公集乎可怪也

黃帝難經明堂殘本跋

殘本黃帝內經明堂一卷題曰通直郎太子文學臣楊尙善奉勅撰注有自序案唐書藝文志有楊尙善黃帝明堂類成十三卷尙善自序云十二經脈各爲一卷奇經八脈復爲一卷合爲十三卷與唐志所稱十三卷合當卽此書也其書取素問靈樞腧穴針灸論治分十二經編類而音釋之其釋腧穴諸名曰中府一名膺中輸膺胃也輸委輸也胃氣歸此故謂之輸天府者肺爲上蓋爲府藏之天肺氣歸于此穴故謂之天府俠白者白肺也此穴在臂俠肺兩廂故名

俠白尺澤者一尺之中脈注此處流動而下與水義同故名尺澤孔最者孔者空也手太陰脈諸脈中勝此之空穴居此脈之左故曰孔最也列缺者列行列也列之缺住之上故曰列缺也經渠者水出流注入渠徐行血氣從□出流注至此徐引而行經謂十二經脈血氣流于此穴故曰經渠太淵者少商初出爲及可謂小泉魚際停□此中湧注故曰太泉水出井流而動脈出指流而上行大指本節後象魚形故以魚名之赤白內呼故曰魚際少商者手太陰脈歸于肺肺之算于秋脈之所起地之方商也其言如漢人

解經疏通証明訓詁精確爲自來注醫書者所未有
惜祇存肺經一卷不得見十二經腧穴命名之義也
尙善所著見于新唐書藝文志者有老子道德經注
二卷莊子注十卷老子指略論二卷道德經三略論
三卷今皆不傳藝文志作明堂類成此本無類成二
字未知何故卷末有寬元年以相傳本書寫畢一行
案寬元爲日本八十六代四條年號其元年當宋紹
定六年蓋從七百年前抄本傳錄者

黃帝內經太素跋

黃帝內經太素三十卷題曰通直郎守太子文學臣
楊尙善奉勅撰註缺卷一卷四卷七卷十六卷十八
卷二十一其六卷卷二缺末卷三缺首卷六缺尾卷
八缺首卷十缺首卷十二缺首卷十四缺首卷十七
祇存尾三頁卷二十二首尾皆缺卷二十九缺首卷
三十缺首其完全無缺者僅卷五卷九卷十一卷十
三卷十五卷十九卷二十三卷二十四二十五二十
六二十七二十八其十二卷耳案尙善貫里無攷僅
據結銜知爲通直郎太子文學而已新唐書藝文志

纂于錄治平中林億等奉詔校正醫書太素亦在其
列見林億等甲乙經序蘇魏公集本草後序素問新
校正及甲乙經校正引其說甚多是此書在北宋必
亦刊行至南宋而始佚故晁陳書目遂無其名也每
卷後仁平元年仁安二年書寫點校等字案日本近
衛仁平元年爲宋紹興二十一年六條仁安二年爲
宋乾道三年是從八百年前抄本傳錄者其書以素
問靈樞分類編次而音釋之與甲乙經相類與今本
多不同與素問新校正所引多合

北宋本外臺秘要跋

外臺秘要方四十卷題曰朝散大夫守光祿卿直秘閣判登聞檢院上護軍臣林億上進每葉二十六行每行二十四字神宗以前帝諱嫌名皆闕避前有王燾自序及孫兆序後有皇祐三年內降指揮熙寧三年鏤版指揮及校正林億等銜名三行中書門下富弼等銜名八行每卷後或題右從事郎充兩浙東路提舉茶鹽司幹辦公事趙子孟校勘或題右迪功郎充兩浙東路茶鹽司幹辦公事張寔校勘當是浙中刻本故校勘皆浙東官耳卷一卷九後有朝奉郎提

舉藥局兼太醫令醫學博士臣裴宗元校正一行以
崇禎中程衍刊本校之刪削幾及二萬字妄改處亦
復不少黃蕘圃孝廉宋刊之富甲于東南僅得目錄
及第廿三兩卷見百宋一廬賦註日本雖有全書模
印在後多糊模處見經籍訪古志此本宋刊初印無
一斷爛洵海內外之鴻寶也書中痰字皆作淡明本
改作痰擔字皆作檐明本改作檐案說文無痰字廣
韻始有痰字云胃上水病一切經音義卷三淡飲胃
上液也其字作淡不作痰與此本合說文亦無檐字
人部檐何也卽今檐字漢書貨殖傳漿千檐西域傳

負水僭糧此僭之正字也楚辭哀時命負檐荷以丈
尺兮史記虞卿列傳檐簦范雎列傳檐簦皆從木作
檐禮記喪服四制或曰檐主宋本注疏亦從木作檐
與此書合此僭之假借字也明刻改淡爲痰改檐爲
擔此明人不識字之通病也是此書不但有功醫學
並可參証小學宋本之可貴如此燾書原有雙行夾
注明刊往往于原書夾註上加通接二字竊爲已說
尤可笑也

北宋本千金方跋

孫真人千金方卷一至卷五卷十一至十五卷廿一至三十凡二十卷皆北宋本每葉廿八行行二十四字首行題曰新雕孫真人千金方版心或題千金方幾或題千金幾無字數及刊工姓名卷六至卷十卷十六至十九元刊本題曰重刊孫真人備急千金要方每葉廿二行行二十二字小黑口版心題金方幾卷二十配明慎獨齋本題名行款與元刊同白口版心有千金方及某某類等字宋刊元刊皆有滎陽開國之裔鄭氏家藏圖書朱文長印審其印文必明初

人其明刊本爲黃薨圃氏所配也則是書全本明初已不可得矣卷一爲類八曰習業第一精誠第二理病第三診候第四處方第五用藥第六合和第七服餌第八卷二婦人上爲類八求子方第一有胎惡阻第二養胎第三有胎病方第四難產第五子死腹中第六逆生第七胞衣不出第八卷三婦人中爲類八虛損第一煩悶第二中風第三心腹痛第四惡露第五下痢第六小便第七雜方第八卷四婦人下爲類四補益第一不通第二崩中第三月水不調第四卷五小兒爲類八序例第一初生第二驚癇第三客忤

第四癰疽第五傷寒第六咳嗽第七癥結第八雜病
第九卷十一爲類五肝藏脈論第一肝虛實第二肝
勞第三肝筋極第四癥結癖氣第五卷十二爲類七
膽府脈第一膽虛實第二咽門第三髓虛第四補虛
煎第五吐血方第六萬病方第七卷十三爲類八心
藏脈論第一心虛實第二心勞第三脈極第四脈虛
實第五心腹痛第六胃痺第七頭風第八卷十四爲
類七小腸腑脈論第一小腸虛實第二舌論第三風
眩第四風癰第五驚悸第六好忘第七卷十五爲類
七脾藏脈論第一脾虛實第二脾勞第三肉極第四

肉虛實第五熱痢第六冷痢第七卷二十一爲類五
消渴第一虛悶不得眠第二淋閉第三尿血第四水
腫第五卷二十二爲類五序論第一菓實第二菜蔬
第三穀米第四鳥獸第五卷二十三爲類六丁腫第
一癰疽第二發背第三丹毒第四癰疹第五瘰疽第
六卷二十四爲類五九漏第一腸癰第二腸痔第三
癰疥第四惡痰第五卷二十五爲類八解食毒第一
百藥毒第二五石毒第三蟲毒第四胡臭第五脫肛
第六瘤癭第七癰病第八卷二十六爲類四卒死第
一蛇毒第二被打第三火瘡第四卷二十七爲類十

六平脈火法第一五藏脈輕重第二指下形狀第三
五藏脈所屬第四分別病狀第五三關對治法第六
五藏積聚第七陰陽表裏虛實第八何時得病第九
扁鵲華陀察色第十五藏六腑氣絕候第十一四時
相反第十二死期年月第十三扁鵲診諸反逆死脈
第十四診百病死生第十五三部死生決第十六卷
二十八爲類八養性第一道引養性第二黃帝雜忌
第三按摩法第四調氣法第五居處法第六房中補
益第七服食法第八卷二十九爲類六明堂三人圖
第一三陰三陽流注第二針灸禁忌法第三五藏六

腑旁通法第四用針界例第五灸例第六卷三十孔
穴主對法爲類六頭病第一舌病第二膝病第三風
病第四癲病第五雜病第六校以日本覆宋治平本
不但編次先後迥然不同卽字句方藥幾于篇鮮同
章章勘同句惟與治平本校勘記所稱唐本多合洵
爲孫真人之真本非林億旣校以後刊本所可同日
語也

明刊類證傷寒活人書跋

增注無求子類証傷寒活人書二十二卷明吳勉學
醫統正脉刊本以宋本校之前多釋音四葉傷寒藥
性四葉目錄十六葉又引素問靈樞難經仲景諸家
之說爲之註有雙行註者有低二格雙行列于各條
後者肱有自註與增註不分大約不引舊說者爲肱
自註其引舊說者皆增註也卷一至十一分卷與宋
本同卷十三十四十五卽宋本之卷十二十三也卷
十六七八卽宋本之卷十四五也卷十九卽宋本之
卷十六卷二十卽宋本之卷十七卷二十一卽宋本

之卷十八其卷二十二爲李子建傷寒十勸非肱所
著與卷首之釋音藥性皆後人所增也增註出何人
之手明刻不著其名查樓鑰攻媿集增釋南陽活人
書序曰無求子朱公肱士夫中通儒也著南陽活人
書吾鄉王君作肅爲士而習醫自號誠庵野人以活
人書爲本博取前輩諸書凡數十家手自編纂參入
各條之下名曰增釋南陽書據此則此本爲王作肅
所輯當改題曰吳興朱肱撰四明王作肅增註則得
其實矣

宋板南陽活人書跋

重校證活人書十八卷宋朱肱撰宋刊本前有肱自序進書表青詞謝表謝啟後有肱後序每葉二十行每行十九字每卷各有小序卷一論經絡卷二論切脈卷三論表裏卷四論陰陽卷五論治法卷六論傷寒傷風熱病中暑溫病溫瘧風溫風疫中溼風溼溫溫瘧病溫毒之名卷七論痰證食積虛煩腳氣與傷寒相似卷八論發熱卷九論惡寒卷十論結胃與痞卷十一論咳逆卷十二十三論藥證卷十四十五雜方卷十六婦人傷寒卷十七論小兒傷寒卷十八論

小兒瘡疹直齋書錄解題文獻通攷宋史藝文志皆著于錄

四庫未收阮文達亦未進呈吳勉學醫統正脈所刊分二十二卷首題增注無求子傷寒類證南陽活人書與此不同非原書也案肱字翼中自號無求子歸安人父臨胡安定弟子精于春秋兄服宋史有傳肱元祐三年進士著有酒經

四庫全書箸于錄建中靖國元年官雄州防禦推官知鄧州錄事參軍因日蝕地震上書攻輔弼之失並遺曾布書隨奏進呈詔付三省知不爲布所容遂致

仕歸尋起爲醫學博士政和元年坐書東坡詩謫達
州明年提舉洞霄宮寓居杭州之西湖官至朝奉郎
直秘閣肱善論醫尤深于傷寒在鄧州時太守盛次
仲疾召肱視之曰小柴胡湯証也請并進三服至晚
乃覺滿又視之間所服藥安在取以視之乃小柴胡
散也肱曰古人制咬咀謂剉如麻豆大煮清汁飲之
名曰湯所以入經絡攻病取快今乃爲散滯在鬲上
所以胃滿而病自若也因依法旋製自煮以進二服
遂安見通鑑長編紀事本末泊宅編談鑰吳興志酒
經序直齋書錄解題據肱自序京師湖南福建兩浙

先有印本錯誤頗多政和八年重爲參詳鑲版杭州
大隱坊故曰重校證云直齋當據杭州刊本箬錄故
亦分十八卷郡齋讀書志二十卷當據別本箬錄宋
志通攷又以郡齋爲藍本耳原名無求子傷寒百問
方大觀中武夷張藏爲易今名南陽仲景里貫活人
者取華陀語也肱爲安定再傳弟子以抗直忤時相
恬于仕進湖州府志列之藝術淺之乎視肱矣

是齋百一選方跋

新刊續添是齋百一選方二十卷宋王璆撰東洋覆元本書錄解題宋史藝文志皆著于錄解題三十卷宋志二十八卷朱竹垞所藏元本亦作二十卷曝書亭集有跋與此本合宋志及解題殆傳寫之訛耳前有慶元丙辰章楫序及歲在癸未劉承父刊梓木記四庫全書未收阮文達亦未進呈案璆紹興山陰人字孟玉號是齋淳熙中爲淮西幕官十六年奉檄和州慶元三年官漢陽守見本書及江湖長翁集其書分三十一門方一千有餘凡方之傳授治之効驗記

傳履歷三足並列一
述甚詳在宋人方書中足稱善本非王袞博濟方嚴
氏濟生方所能及也凡續添之方皆注明續添二字
其爲是齋所續或爲承父所添則不可考矣

元槩風科集驗名方跋

新刊風科集驗名方二十八卷題曰北京大醫趙大
中編修覃懷儒醫趙子中傳習大元國特賜皇極道
院虛白處士趙素才卿補缺元大德十年劉世榮刊
于杭州每半葉十行每行二十一字板心有字數及
刊工姓名前有閣復安慶光華趙素杜道堅左斗元
敘元好問皇極道院銘後有鄭滌狄思聖臧夢解序
四庫全書未收阮文達亦未進呈明以來藏書家惟
錢遵王讀書敏求記箸于錄此本爲明孫雲翼舊藏
後歸同里蔣氏余以重值得之第七八兩卷抄補九

卷全缺日本多藏中國古書經籍訪古志所載福井
榕亭藏本祇存五六二十四四卷此本僅缺一卷
誠海內外之孤本也趙大中未詳里貫金末太醫院
官趙子中覃懷人趙素河中人字才卿號心庵全真
教道士也元初旌車特徵賜號虛白處士三年以母
老辭歸鎮發帑築館于迎祥觀之故基賜名皇極道
院箸爲政九要述經世之法蓋非僅以醫名者素書
分十集七十七類六百三十二方廬陵左斗元因素
門人劉君卿之請增爲二百四十二類一千九百七
十九方風科諸方略備于斯矣

博濟方跋

博濟方三卷宋王袞撰傳抄大典本前有袞自序及
郎簡序提要云袞太原人其仕履未詳惟郎簡序稱
其嘗爲錢塘酒官而已愚按袞臨川人自署太原著
郡望也皇祐元年進士見江西通志沈邁有屯田員
外郎王袞可都官員外郎制見西溪集熙寧八年二
月庚辰中書言堂後官王袞等編定命官四等過犯
乞付有司元豐五年五月癸巳分命大理少卿王袞
斷刑見通鑑長編考郎簡卒於嘉祐元年年八十九
卒時自云退居十五年見咸淳臨安志及宋史本傳

是簡之退居武林在慶厯二年序當作於其時沈邁
以右正言兼知制誥在嘉祐五年明年出知越州見
嘉泰會稽志其爲翰林學士在英宗時見宋史本傳
集中制語必英宗時作居多蓋衰於慶厯中爲酒官
至嘉祐治平間官屯田員外都官員外熙寧中爲中
書堂後官元豐中爲大理少卿時代却合當卽其人
箸婦人良方之陳自明乃南宋嘉熙時人非衰所及
見卷四大琥珀丸下引自明管見良方必非原本所
有蓋爲後人羈入耳

王梁陳刊本本事方跋

右許叔微本事方十卷王梁陳刊本前六卷以宋乾道刊校後四卷以影抄宋淳熙本校卷一蘇合香丸卷二衛真湯白附子散第二方荊芥散透頂散兩方黑龍丸第二方第三方卷三川芎丸卷四靈砂丹第二方寒熱方牛膝酒浸丸卷五槐花散第二方第三方熱毒下血方梅師第二方菊花散第二方治睛病方針頭丸兩方牙痛三方治口舌生瘡三方加減甘露飲兩方治耳卒癰閉方卷六治鼠瘻癰兩方治丹從膈起治火丹治螢火丹卷七染鬚髮方皆兩宋本

所無均爲削去影宋抄卷七芎藭湯後有保神丸方
論百三十餘字桂子加附子湯前有大青龍湯溫粉
方論百七十餘言卷八大柴胡等三服得汗而解下
有嘗謂仲景云云百許言密兌法後有製法七十餘
言海蛤散治結胸後有期門二穴云云八十餘言白
虎加人參湯有方論百餘言其前有清心丸竹葉石
膏湯方論百四十餘言瓜蒂散前有五苓散方論二
百許字卷終有一呷散方論一百二十餘字卷九小
柴胡湯日三服下有胸中煩而不嘔云云百三十餘
言小承氣湯有方論數十言補脾湯後有金液丹來

復丹方論及氣海灸法八百餘言卷終有來甦丹百餘言補銀丸前有捻金散數十言石可化破下有治小兒陽癰云云百餘言醒脾丸前有青州白丸子方論百五十餘字皆此本所無淳熙本有所增益張孝忠敘自言之雖有非叔微原本亦無可攷皆爲補錄于上乾道本前有自序兩葉修治藥法四葉影鈔淳熙本有張郊張孝忠兩序命純兒影摹入卷以存宋本之眞叔微所著尙有續本事方十卷

四庫未收阮文達亦未進呈余藏有抄帙所削三十
四方皆見續本事方其爲梁陳刊版時孱入或明以

前已屏入則莫可考耳

全生指迷方跋

全生指迷方四卷宋王貺撰

文瀾閣傳抄大典

本也案貺字子亨考城人本土人爲南京名醫宋毅叔道方之壻貺傳其學未精薄遊京師甚困會鹽法忽變有大賈覩揭示失驚吐舌不能入經旬食不下咽醫不能療其家憂懼榜于市曰有治之者當以千萬謝貺利其酬之厚姑往應之旣見賈狀謬爲大言爾家當勒狀與我萬一不活則勿尤我當爲若針之可立效主者不得已從之急針舌之底抽針頃刻伸縮如平時自是名動京師宣和中以進頌補從事郎

積遷至奉直大夫靖康中例行追奪建炎二年補朝
奉郎假拱衛大夫合州防禦使副劉誨爲金軍通問
使其書原名濟世全生指迷集吳敏序之曰子亨當
官不苟遇世變嘗慨然再請出疆使萬里云見書錄
解題趙希弁讀書附志建炎以來繫年要錄蓋脫本
佞倖之徒以醫得幸所謂願出疆使萬里者無非熱
中徼倖豈誠有忠臣愛國之心哉敏亦儉人其言無
足重輕也

鍼灸資生經跋

鍼灸資生經七卷影寫明正統間廣勤書堂刊本題曰大監王公編每頁二十四行每行二十二字前有嘉定庚辰奉議郎提舉淮南東路常平茶鹽公事徐正卿敘目後有正統十二年孟夏三峯景達詳咨木記卷末有三峯廣勤葉景達重刊一行蓋明時麻沙刻本也案趙希弁讀書附志鍼灸經七卷右王執中所編也執中東嘉人嘗爲從政郎澧州教授云今觀書中所引如靈蘭秘典難經疏陸氏續集驗方耆域方今皆不傳自敘治效所得頗深蓋士人而精于醫

者閣本有紹定四年趙綸序此本缺執中所著尙有
既效方見書中今不傳